

**DATUK BATUAH** ( ? -1950-an), ulama dan ahli politik Indonesia. Nama sebenarnya ialah Ahmad Chatib. Dia memegang jawatan tradisi sebagai penghulu adat dari Koto Lawas (Padang Panjang) dan mendapat pendidikan agama daripada Syekh Haji Abdul Karim Amrullah. Dia ialah salah seorang pelopor penubuhan pembaharuan sistem pengajaran Islam dan pelopor sekolah agama, Sumatra Thawalib.

Pada tahun 1923, dalam perjalanannya ke Aceh, dia berkenalan dengan Natar Zainuddin, seorang pegawai

kereta api yang telah dipecat kerana aktif sebagai propagandis Perpaduan Pekerja Tram dan Kereta Api (VSTP) yang menganut ideologi komunisme. Natar Zainuddin diusir dari Aceh dan pulang ke Minangkabau. Datuk Batuah kembali mengajar di Sumatera Thawalib, tetapi dia lebih sibuk mencari kesesuaian Islam dengan komunisme.

Datuk Batuah mendirikan International Debating Club, yang dapat menarik pelajar Sumatera Thawalib untuk membicarakan masalah semasa, dengan pendekatan 'komunisme Islam' dan menerbitkan majalah *Djago! Djago!* yang ditujukan kepada masyarakat awam dan majalah *Pemandangan Islam* yang lebih bersifat ilmiah. Mengikuti pengarangnya, *Pemandangan Islam* berusaha mempertemu ilmu penyusunan masyarakat untuk keperluan massa yang hidup dalam kemelaratan dan kesengsaraan dengan tuntunan akidah Islam.

Pengaruh Datuk Batuah yang cepat meluas menimbulkan khabar angin seperti rancangan pemberontakan dan pembunuhan semua orang Eropah. Usaha para pengikutnya untuk mempengaruhi Kerapatan Minangkabau, sebuah organisasi agama dan adat agar membelakangi ulama Kaum Muda dan memperlihatkan sikap politik lebih radikal, seakan-akan membenarkan khabar angin ini.

Pada tahun 1923, Datuk Batuah dan Natar Zainuddin ditangkap dan dibuang ke Digul. Pada tahun yang sama, Persatuan Guru Agama Islam (PGAI), organisasi ulama Kaum Muda, mengatakan bahawa Islam tidak dapat disesuaikan dengan komunisme. Pada bulan Januari 1927, pemberontakan komunis (yang Islam) terjadi di Silungkang, tetapi dapat dihapuskan dalam beberapa hari.

Pada tahun 1946, Datuk Batuah kembali ke Minangkabau daripada pembuangan pada saat revolusi dan perang kemerdekaan Indonesia sedang memuncak dan dia kembali aktif.

Datuk Batuah meninggal dunia pada tahun 1950-an.